

Inatsisartut suleriaasianni § 37 naapertorlugu matumuuna Naalackersuisunut imaattunik apeqqu-teqaatinik saqqummiussivunga:

**Apeqqu:**

**1. Naalackersuisut Tunumi pilersaaruteqarpat katsorsaavimmik pilersitsiniarlutik?**

(Inatsisartuni ilaasortaq, Laura Tàunâjik, Siumut)

**Tunngavilersuut:**

Imigassamik atornerluinerup kingunerisai takorloorneqarpiarsinnaanngitsumik annertussuseqarput, tamannalu inuttut aammalu inuiaqatigiit aningaasaqarniarnerannut sunniuteqartarpoq. Inuttut kingunerisai – atornerluisumut aammalu atornerluisup ilaqutaannut – ilisimaneqarluarput. Inuiaqatigiit aningaasaqarniarnerisa naatsorsuutaasa akiligassartai tikkuartorneqarniarsarineqarput Naalackersuisut nalunaarutaanni ”Imerajuttunut katsorsaaneq, pisariaqartitsineq aammalu inuiaqatigiit iluanaarutissaat (UPA 2014). Nalunaarummi missingersuunneqarpoq, inuiaqatigiit aningaasaqarniarnerinut aningaasartuutit imigassamik atornerluinermik tunngaveqartut ukiumut 152 aamma 827 millionit kr. akornanniittut.

Naalackersuisut UPA 2015-imi imigassamik katsorsaaneermut tunngatillugu nuna tamakkerlugu siunissamut pilersaarut saqqummiuppaat. Inatsisartut Aningaasartuutissanut inatsimmi 2016-mut pilersaarutip inaarsarneqarnissaannut aningaasanik immikkoortitsisimapput.

Nuna tamakkerlugu pilersaarummi pingaarutillit arlaqarput, taakkunanilu pingaartutut isigineqartut ilagivaat najukkami katsorsaasoqassatillugu innuttaasut susassaqtullu akisussaaqataanissaat imaluunniit susassareqatigiittoqarnissaa. Tassalumi pilersaarutip siunniussai ukiuni siullerni pingasuni imatut isikkoqarlutik; Kommunini tamani katsorsaavinnik pilersitsisoqassasoq.

Tamanna nuannaarutissaavoq. Najugaq qimannagu katsorsartoqassatillugu ilimagineqarsinnaavoq ajornanninnerusumik katsorsartittoqarsinnaanngussasoq aammalu katsorsartereernermi

nakkaqqiinnartartut immaqa ikilisinnaallutik. Kommunit arlallit (Qaasuitsup Kommunia aamma Kommuneqarfik Sermersooq) taamalillutik nalilerpaat, nakkaqqinnissamik sioraneq annertulersartuq, atornerluisoq najugarisaoq qimallugu katsorsartikkiartussappat.

Kommuneqarfivut annertupput, illoqarfiillu amerlanerit katsorsaaveqalernaviangillat. Taava tassa apequtaalerpoq, illoqarfiit sorliit pingaarnersiuiinermi toqqaassanersut.?

Tunu eqqarsaatigalugu ukiorpaalunni sakkortungaatsiartumik imigassamik atornerluiffiuvoq – ima sakkortutigisumik eqqugaallutik allaat Naalakkersuisut imigassamik tuniniaanermik inerteqqutit atuutilersittariaqalersimallugit.

Tamannaluunniimmi immikkut isigalugu katsorsaavissamik nutaamik pilersitsinermi Tunumi inissiisoqarnissaannik tunngavilersuutaareersinnaavoq. Iimagilluinnaqqissaarpara inuppassuarnut eqqumiigineqarataarsinnaasoq paasiuminaassallunilu, Naalakkersuisut illutungaani Tunumi imigassamik killilersuillutik matusippata, illuatungaatigullu katsorsaavissanik nutaanik inissiinalermi Kitaani inissiissappata.

Inummut imigassamut nakkarluinnarsimasumut, ajornakusoortorujussuusinnaavoq imigassamik ajornartorsiutini nassuerutigissallugit aammalu ikioqqunissaminnik saperluni.

Nunaqqatitsinnut Tunumiittunut alloriarfissat annertunerusapput, nammineq nunagisaminni katsorsartissinnaappata, tamatumani oqaatsit nammineq atukkatik namminerisamillu piorsarsimassusiat toqqissisimaffigalugu ajunnginnerpaajuvoq. Inuttut qaangerniagassat ikileriataartussaapput, imigassamik atornerluisup katsorsartikkumalluni angernerminni meeqqani aapparisanilu ungasissumut qimannagit suliaritissinnaappat ajunnginnerpaavoq.

Tunngavissaqarluarpasippoq katsorsartikkumasut piumanerussasut najukkami katsorsaanissamik neqeroortoqarpat. Taamatuttaaq tunngavissaqarluarluni isumaqartoqarsinnaavoq, najukkami katsorsartittut nakkaqqajaannginnerussasut. Allatut oqaatigalugu tunngavissaqarpasippoq isumaqaaqqajaanarlunilu Tunumi katsorsaavimmik pilersitsisoqartuuguni siuariaatigissagipput.

Tunumi kisiartaalluta imigassamik atornerluinngilagut – kisitta ajornartorsiutiginnilarput – kisianni Tunu sakkortunerpaamik eqqugaavoq, imigassamik atornerluinermik atuisunik aammalu inunnik isumaginninnermut ajornartorsiortunit.

Nuna tamakkerlugu pilersaarut iluatsilluarluni siunissamut sunniuteqassappat ilumut nuna tamakkerlugu pilersaarutaalluni – taava Nunatsinnut tamanut neriuuteqartitsisariaqarpoq – tamatumaniilu iluaqutaangilaq, Tunu takunngitsuusaarlugu qaangiinarutsigu.

Tunumi aamma neriuuteqarnissaminnik atorfissaqartitsipput!

Saqqummiussakka tunngavigalugit Naalakkersuisut qinnuvigissavakka naluaarutigeqqullugu,  
Tunumi nutaamik katsorsaaviliornissamik pilersaaruteqarnersut?